

四庫全書

集部

欽定四庫全書

集部

文苑英華卷九百
六

四至

詳校官庶吉士臣龍廷槐

助教臣常循覆勘

總校官進士臣朱 銓

校對官助教臣羅萬選

謄錄監生臣倪景寬

欽定四庫全書

文苑英華卷九百四

宋 李昉等 編

職官十二

諸將軍一

周大將軍崔說神道碑一首

周大將軍司馬裔碑一首

周大將軍崔說

周書作崔

神道碑 庾信

公諱說字某博陵郡安平縣人也昔者華陽之野降龍首之神烈山之都啓龜文之繇匡周則盟津有會佐夏

則龍門始鑿西遊則起家秦相東入則載世齊卿備乎

史籍可得言矣祖辨中軍將軍

魏書北史並作安南將軍

定州刺史

父楷鎮北將軍司馬

魏書周書北史並作驃騎將軍開府儀同三司

烈侯並厲

風霜俱張鋒穎卽史疊迹官曹凜然是謂鮑恢都官百

城振懼葛豐握節京師斂手公特稟英靈偏鍾山岳雄

姿俊茂眉目踈朗觀虎於檻齧髮不驚稱象於船勝衣

能對至於拉虎羈

一作押

熊摧班碎掌忘歸繁弱落鴈吟

援故得氣蓋關中威申河外解褐領軍府錄事轉諮議

參軍時當塗失御政在權門始論函谷之兵即起韓陵
之戰太師賀拔勝作牧西荆公為假節冠軍將軍防城
都督夫

疑作及

南陽失守卷甲奔梁樂毅羈旅猶思燕路

陳軫愴悽終戀秦聲幸值和隣言歸舊國授衛將軍都
督封安昌縣開國子食邑三百戶弘農尅復沙苑揮鋒
進爵為侯增邑并前一千一百戶信珪則更受司勳穀
壁則還輸典瑞鐵馬有河橋之戰戈船有汾水之兵除
京兆太守移民下邑未學邊韶走馬章臺不同張敞遷

帥都督持節撫軍通直散騎常侍大都

闕

使持節

車騎大將軍儀同三司都官尚書定州大中正五曹奏
事有朱穆之忠九品論人見楊喬之直改封安國縣侯
益邑合前一千四百戶賜姓宇文改名為說漢王改婁
敬之族事重論都魏后變程昱之名恩深捧日遷車

周書

北史

作驃騎大將軍開府儀同三司加侍中竇憲連官單于

之寶鼎可致張寬固位渭橋之流星可識司木七工既
掌邱陵之賦司會六典乃均邦政之才居官得人於斯

為盛進爵為公改封萬年縣通前二千四百戶除隴州
刺史都督隴州諸軍事隴坻路遙秦川望遠鄧仲華之
不去馬文淵之願歸尋除涼州刺史總督河西甘瓜諸
軍事地似伏龍城如飛鳥燉煌實錄宛在胷襟玉門亭
障無勞圖畫有馬如羊不以入厩有金如粟不以入懷
柱國齊王今上之介弟龔行薄伐問罪河陽以公為行
軍長史叅謀帷幄中軍之司既舉魏絳上卿之佐實用
荀林以公方之差無慙德

周書有軍
遂二字

除使持節大將軍

大都督崇德安義建忠九曲安樂三泉伏流周張平泉

固安蠻通俗凡十三防禦熊和中

周書如此按隋地理志陸渾日和州新安

置中恨今北史志後周時宜陽曰熊作能和中未詳英華作天和中非

三州黃蘆起谷王

晏供超牽羊溫狐交河大嶺避雨木柵寺一十戍諸軍

崇德防主宜陽上地更有秦兵熊耳山前還逢積伏用

是連營函谷獵騎黎陽威振兩河名陵三晉改封安平

縣公淮陰一國韓信之故人戶牖萬家陳平之鄉里公

此衣錦足為連類建德四年正月十日薨於長安之水

貴里私第春秋六十有四詔贈敷

周書作
郎下同

延丹綏

周書

長作

五州諸軍事敷州刺史謚曰莊公禮也即以其年二

月二十四日葬于京兆平原鄉之吉遷里北陵追遠大
司馬有賜綬之恩西京贈行冠軍侯有詔葬之禮嗚呼
哀哉世子儀同衍生事以禮死葬以禮愛親有王祥之
孝同氣有姜肱之睦百行之本於斯備焉况復松檟深
沉既封青石之墓丘陵標榜湏勒黃金之碑乃為銘曰
華陽之神厲山之祖鳳野匡周龍門佐禹日浴溟池山

浮海浦甫穆霸國營丘樂土脩斯宗邑承此壤王移封
東武就君安陽中軍節目鎮北鋒芒商飈獵草電火驅
霜公之輪煥繼體貞幹儀表邱墟風神墻岸孝有至德
忠能臣贊不廢橫琴無妨歌案既班三事又貳六官衛
青受詔韓信登壇長城馬窟廣武兵欄軍吏無犯營民
不寒乃用六謀乃論三策城壘向背星辰主客劔起沉
犀弓開伏石楚后讓盟秦君還壁百齡危脆千仞推藏
諸侯地裂邊將星亡輕車騎士玄甲黃腸杜如齊地廟

似桐鄉銘功贊德碑闕相望

周大將軍司馬裔碑

前人

公諱裔字遵胤河內溫人也昔顓頊之命始則南正司
天重黎之後又以羲和掌曆夏陽適晉得隨會而同奔
東海避秦與毛公而俱隱其後金行受命王筍南遷帝
系極於闕圖中朝至于江表曾祖楚之晉太傅錄尚書
揚州牧會稽文孝王之次子元顯之幼弟也元顯見害
之後桓玄篡逆之初爰自韶亂客身屠釣河內道左抱

劍長號代郡城前慟悲靈祭江淮志節之士汝穎風塵
之客感激一言咸多依附既而雲生伏龜星出鯨魚太
白經天蚩尤映野公乃收合餘燼泣血登陴臨武牢之
關據成臯之坂擁衆萬家歸于魏室魏明元皇帝遙授
平南大將軍荊州刺史襲封瑯琊郡王尚河內公主命
王承制從賓國之儀于時宋兵憑凌旗鼓侵逼虎牢不
封金墉無援魏太武皇帝授王使持節侍中安南大將
軍開府儀同三司給前後部鼓吹元戎啓行志雪冤恥

登壇慷慨三軍掩泣黃河漕粟已出石門士馬連旗將
臨野坂既而雲中析起代郡烽燃反旆南轅途窮北略
贈征西大將軍都督梁益秦寧荆兗青豫郢洛十州諸
軍事揚州牧司徒謚貞王祖金龍封瑯琊鎮西大將軍
儀同三司吏部尚書贈司空謚康王父悅鎮南將軍豫
州刺史漁陽莊侯周書北史
並作子以荆河刺舉時值亂離釁
起蕭牆遂終非命公遺腹載誕流離寇逆復壁襁負深
山擁樹程嬰之匿趙武從役家臣王成之藏李燮為傭

酒市遭太夫人憂苦草墳塋以終灰燼形骸毀瘠逾於喪禮年十有五始幹家事楹前鑿柱即取遺書石上開松仍求故劍出身司徒府叅軍除中堅將軍員外散騎常侍值魏室多難所在蜂起孟津以北無復封畿嵩山已南即為鋒鏑公建議脩武立柵温城函谷西封河橋北斷長亭籍馬並入武城百里祖車咸輸温縣太祖文帝締構關都經綸夷阻招携以禮懷遠以德馬文淵之擇主去壘坻而歸身實周公之入朝在河西而奉詔大

統七年蒙授平東將軍北徐州刺史十年河內故義四千餘家願立忠誠湏公衣錦乃授使持節領河內太守加前將軍懷州拓境兩鎮奔波柳泉轉戰三城授首十

三

周書北史
並作五

年太祖召山東諸立義之將能率衆入關

者有加重賞公率先而至領戶千室即以為封固辭不受其菽粟之賜或以指困馬牛之賞將同量谷朝廷以華陽西極漢水東流歎孟達之奔兵恠劉封之失策魏前元年移鎮漢中除白馬城主領華陽郡守者昔稱導

漾今聞上瀦烟沉冰井雨歇雲門其年授大都督加散騎常侍柱國蜀國公開金牛之道通牧馬之關公卷甲北塞懸軍束馬遂得策預葭萌勳叅綿竹封龍門縣開國子蒲州刺史仍領新州尋授使持節車騎大將軍儀同三司大中正隆周授圖天保大定以公才望仍為舊臣遂乃義深追遠恩隆繼絕即改封瑯琊縣公邑五百戶仍遷驃騎大將軍開府儀同三司都督巴州諸軍事巴州刺史武成二年被勅赴援信州魚復道阻屢却岑

彭荆門水急幾沉吳漢公乃月峽先登瞿唐直上天子
以公操履忠勤儀刑亮直乃徵為大御伯尋轉大御正
邑一千一百戶樞機近侍出納絲言所謂多識舊章殿
中無雙者矣四年大將軍東討公所領義衆先守枳關
授都督懷州諸軍事懷州刺史偃師張幕河陽牧馬雖
接戰於富平已連營於官渡五年詔追還拜始州刺史
更封信州賊山彰尋寶渝恃險岐路五尺絙約纜通縣
水三門橋飛濟渡既而風行草偃谷靜山空前後平十

一城獲九千餘口馬歸平樂金輸水衡天保二年除信
州刺史都督信州諸軍事朝發白帝暮宿江陵氣振巴
邱之兵威警建平之戍五年遷潼州刺史益州柱國公
降帝子之重鎮天井之星延閣擬於叢臺岷山方於代
郡公仰稟雄謨叅謀遠略故得身預舞陽之功位極長
平之寵六年授使持節大將軍大都督西寧州諸軍事
西寧州刺史方欲闕沫若徼犴犴見夜郎之候習昆彌
之戰而飛鳶墮水馬援去而無歸金馬騁光王褒行而

不反嗚呼哀哉七年正月十日薨春秋六十有五詔贈

使持節大將軍懷邠汾晉四州諸軍事懷州刺史夫人

襄城公主魏獻帝之曾孫趙穆王季女王姬肅恭榆翟

禮典四敬競

一作競

莊三星令淑有光隆慮之賢足表平

陽之盛生則從夫以秩死則同穴以禮建德元年八月

十二日合葬於武公三時原大夫墓樹以栢諸侯墓高

於雉于嗟滕公來居此里詔謚定公禮也公資忠履孝

蘊義懷仁直幹千尋澄波萬頃逢蒙射法力牧兵書星

辰高下之占風雨逢迎之氣故得師出以律天幸將軍
者也至如官曹案牘未常煩壅戎馬交馳不妨餘裕足
使四岳彌峻三台更明在朝四十一年身經一百餘戰
凡任四郡歷八州未嘗以貨殖經懷去如始至渭南千
畝之竹更懼盈滿池陽二頃之田常思止足身歿之日
家無餘財素車白馬狹室崎嶇黃腸玄甲堦庭仄陋有
詔冬官為營寢室朱邑祭酹無所漢后是以賜金陳表
妻子露立吳王為之開館嗚呼哀哉世子侃孝家忠國

揚忠顯親是以勒此豐碑懼從陵谷殖之松栢不忍凋
枯銘曰

欽若歷象平秩寅賓少梁奔華地入咸秦族夷興馬書
窮獲麟玉鏡云始金行乃構象浦通關龍沙開候上糝
石起河陽水鬪五馬南浮三星東宿大傅作牧奄有江
池司徒避亂承制荆河南勞推轂猶思枕戈龍媒被野
蒼哭凌波莊侯李年禍機相接誕公遺嗣崎嶇懷挾山
竄趙武家藏李燮伍員道阻燕丹路遙南奔楚塞北避

秦橋水流登隴寒風度遼有功都護則重嫖姚懷書上
馬習禮從戎陣圖六甲兵占八風藏松寶劍射柳瑠弓
推誠賈復屈節廉公八翼頻飛六循疑作丞秉勇此仁

條

義行茲寬猛持印山開沉黎盜靜取甲無邱均田不井
懋功賜爵上將賞官軍中受詔塞外登壇方屠叅合更
塵臯蘭渝川毒水變道灾氛地亡都尉灘悲使君谷寒
無日山空足雲北風吹旒秋霖泣軍遣奠雙設銘旌兩
布泌水同墳平陽合墓悲哀嗣子攀號靡訴慟甚風枝

悲深霜露自此何世從斯幾年麒麟欲鬪革表中燃地
形樓起松心蓋圓茫茫邱壠代代英賢

文苑英華卷九百四

欽定四庫全書

文苑英華卷九百五

宋 李昉等 編

職官十三

諸將
軍二

周柱國大將軍拓拔儉碑一首

周柱國大將軍紇干弘碑一首

周柱國大將軍都督同州刺史尒綿末碑一首

周柱國大將軍拓拔儉神道碑

庾 信

蓋聞放勛立而羲和昇重華登而元凱用思皇多士既成西伯之功俊德克明乃定南巢之伐是知惟賢非后弗食惟后非賢弗又若夫君臣一德啓心沃心見之昌

寧文公矣公諱儉字慶明

周書北史並作儉本名慶名

恒州高陸人

也北岳天孫之星燕河帝子之國故多奇節甚茂華風高闕圖南二王齊軫長城拔本十族分源高祖太尉北平王光輔五君允釐百揆恒衛既從淮沂其乂祖豹龍驤將軍恒州刺史常山刺舉非無取代之符龍驤揔戎

或似平吳之號父誠

北史作誠

年止弱冠榮終解印公以五

常蘊智六氣資德乘天則策馬秉靈降神則牽狼應象

直心於物水火恬然無負於天雷霆不懼富貴自取豈

資唐華

疑作舉

之言聲名有聞無勞李膺之識年十八解

褐員外散騎侍郎尋授輕車將軍羽林監太祖文皇帝

駕馭天綱苞羅英傑選公才德光佐中書諸葛亮之西

歸玉壘成三分之業管夷吾之入仕葵邱有一匡之功

天水黠羌漁陽郡盜乃遷秦州刺史長史防城大都督

封信都縣開國伯三年滑州蟻聚保

闕

命靡旗亂轍

乘冰渡河丞相大行臺授假節撫軍行滑州刺史大統
元年授持節東夏州刺史加散騎常侍到支抱馬如聞
耿秉之戰單于願識似畏王商之威五年遷使持節鎮
東將軍都督東北三夏州諸軍事西夏州刺史增邑千
戶改伯為公既而江漢遼遠車書寂寞蜀主的顧未出
檀溪之水秦王飛雉猶向南陽之城六年以公為使持
節都督三荆二襄南雍平信江隨郢浙一十二州諸軍

事荊州刺史東南道行臺僕射楚城隣境實有讓田吳
人對營無妨贈藥部內屬城為人所訟公遂集文武肉
袒自罰兄弟不讓延壽責躬吏民有過翁歸引咎天子
異之璽書勞問贈賄加幣王人接踵大丞相書云此之
美事耳目之所未經歎尚無極故遺疑作遣專使公善於
撫馭長於接引山藪無棄苞苴不行示人赤心與人顏
色盜不敢發民不忍欺至是將校耆老於州城之南起
清政之樓北史作清德樓勒賢臣之頌杜鎮南之作牧當世樹

碑竇車騎之臨戎生年刻石方之今日彼獨何人于時
戶口日增荒萊畢墾華實紛敷黔黎茂豫但恐衮職有
闕待公而補鼎鼐未和湏公而正是以漢民陰望荆南
杞梓並皆上書詣闕連名乞留河內之借寇恂更慙謁
帝交州之請士燮還著上表九年授車騎大將軍儀同
三司十二年除大行臺尚書仍為大丞相司馬以公識
度嚴明志節清儉遂改公名儉字慶明非關書月詎待
看碑幸得千畝不同二山無廢十三年加開府餘官如

故十四年除尚書右僕射加侍中進驃騎大將軍居上
星執法在文昌之位以公才望兼而有之十五年更除
東南道行臺僕射都督十五州諸軍事行荊州事十六
年大丞相總十六軍尅清河洛公又中分麾下叅謀幟
幄高選霸僚公為長史其年加都督南道三十六州諸
軍事餘官如故南陽文學更遇王基章華袞衣還迎郭
賀昔日伐蜀之謀張儀與秦昭討合平吳之利羊祜與
晉武意同大祖始定成都即有江陵之志公密獻其策

懸符深旨糧運久積梯衝立備一戰而舉鄔郢再戰而
燒夷陵遂得席卷三荆此又公之勲也詔賞奴婢三百

口太祖與公書云由公立計果何所謀公頃

疑公作頃

自鎮

江陵以安蜀地後魏二年改武川昌寧郡開國公歷陽
居民非唯景丹之封曲逆戶口豈但陳平之國其年授
大將軍太和之中曹真於府內受冊元封之末衛青於
軍中即拜公之此比綽有餘榮詔曰吳人未復須助謀
謨今使梁王兵馬受公節度三年加都督東南道五十

三州諸軍事增邑萬戶維周革命光宅欽明作貳大官
允諧邦治元年授小冢宰保定二年治蒲州刺史檢校
六坊諸軍事四年治襄州仍授柱國大將軍餘官如故
秩登四岳階平六府豈不功重昭陽名高蔡賜控馭五
十州風行數千里拔園葵而去織婦無三惑而絕四知
一室之中未免虛白日膳之資三杯而已詔乃賜繒綵
一千段粟麥二千斛天和元年陝州刺史都督八州二
十坊諸軍事解荊州總管餘悉如故路出王宮城臨河

曲成清陝右高視棠陰部領宴煩晦明為疾天和四年
謝病故京薨于私第春秋七十有八鑾蹕降臨軒懸輟
樂九旒龍旂之錫三河騎士之送詔贈太保涼夏靈銀
長原河鄣甘瓜十州諸軍事涼州刺史謚曰文公狀貌
邱墟風神磊落玉山秀立喬松直上烟霞之涯際莫尋
江海之波瀾不測少遭荼苦在山服終攀栢樹枯侵松
獸死盡忠事國竭力從政其門如市其心若水竒策密
謀且僚仰止忠貞亮直明主敬焉至如風后陰陽之占

力牧星辰之度魏公子之兵書李將軍之射法莫不成
誦在心取為時用居常服翫或以布被松牀盤案之間
不過桑杯石鼎遺令山陵一無所用公私贈襪並不得
受止依太祖陵側無忘事君墩等兄弟並至性善居喪
號墓墳埏奉遵遺訓是以衛青之塚仍陪漢武之陵管
仲之墳即接齊桓之墓天和六年天子以四海未寧三
方鼎峙有懷將帥之志言念封疆之臣既畫雲臺乃題
麟閣更贈公為鄆國公邑五千戶追崇列辟事極神魂

再改銘旌恩隆封墓公在民留愛身後見思吉日良辰
郊祠野祭儀同趙迨等六百九十七人表求立廟陳請
象魏有詔許焉柱棟杏梁綠墀青瑣按歌會舞鳳蓋霓
裳南浦送而行雲東風颺而零雨是知漢陽郡前非徒
武侯之廟臨淄城下豈獨樂公之杜嗚呼哀哉乃為銘
曰

道鍾也剝世屬雲雷地軸左轉天關北開客車周室繫
馬秦臺乃齊七政爰答三才烈祖燮諧九龔

二字疑

梁棟

取才逢獵求賢入夢匡贊官雲謀猷絕

疑作紀

鳳律定公

族珪分職貢乃惟嗣德寔秉英靈身圖斗宿面繞樞星

青衿敬業童子離經信陵虛右干水分庭忠孝純深樞

機周密孔光不言曹叅勿失溫席扇枕承顏悅膝凍浦

魚驚寒林笋出肅肅風政沉沉器局直似貞筠溫如瑞

玉清不置水明非舉燭馬願如羊金須似粟上將克昇

元戎既序夏陽三捷夷陵一舉憑軾下齊凌江入楚鼎

反歷室鍾歸大呂六卿咸事天官是司二南作伯棠陰

實治清風有頌綠竹聞詩贈行之冊超然帝師昔侍蘭
苑今陪杏林死生契濶無違一心風雲積慘山障連陰
陵田野寂松逕寒深夏嬰之隴橋玄之墓馬見千年車
回三步左無長樂前非武庫直望高碑增悲行路

周柱國大將軍紇于弘神道碑

前人

公諱弘字廣略原州長城縣人也本姓田氏虞賓在位
基於揖讓之風鳳凰于飛紹于親賢之國論其繼世之

功則狄城有廟序其移家之治則長陵有碑况復高廟
上書小車而對漢王聊城祭鳥長岳疑而驅燕將公以
胎教之月歲德在寅載誕之辰星精出昴是以月中生
樹童子知言水上浮瓜青衿不戲而受書黃石意在王
者之圖揮劍白猿心存霸國之用魏永安中任子都督
翻原州城受隴西王節度于時洛邑亂離當塗危逼禮
樂征伐不出於天子舉賢誅暴實在於強臣太祖文皇
帝始創霸功初勤王室秣馬蒐乘誓衆太原公伏劍轅

門粗謀當世隨何遠至實釋漢帝之憂許攸

一作攸非

夜來

即定曹王之業永熙中奉迎魏武帝入關封鴟陰縣開

國子邑五百戶太祖以自着鐵甲賜公云天下若定還

將此甲示寡人白水良劔罷朝而贈陳寵青驪善馬軍

迴而賜李忠並經輿服足為連類大統三年轉帥都督

進爵為公十四年授使持節都督原州諸軍事原州刺

史仙人重返更入桂陽之城龍種復歸還尋白沙之路

公此衣錦鄉里榮之侍從太祖戰河橋復弘農解華山

圍平沙苑陣必有元勳常蒙別賞太祖在同州文武並
集號令云人人如紇干弘盡心天下豈不早定即授車
騎大將軍儀同三司前魏元年轉驃騎大將軍開府祈
連猶遠即受冠軍之官沙漠未開先置長平之府梁信州
刺史蕭詔寧州刺史譙淹等猶處永安稱兵漁陽二字疑
公受命中軍流下瀨遂得朝發白帝暮宿江陵猿嘯不
驚雞鳴即西平反羗本有漁陽之勇鳳州叛氐又習仇
池之氣公推鋒直上白刃交前萬死一決凶徒多潰身

被一百餘箭傷肉破骨者九瘡焉被十槩露布申上朝
廷壯焉糾糾葛屨魏有去舊之歌零露漙漙周受惟新
之命乃進爵封鴈門郡公食邑通前二千七百戶保定
元年授使持節都督岷州諸軍事岷州刺史隴頭流水
延望秦關川上峨眉猶通蜀道公不發私書不燃官燭
獸則相負渡江蟲則相銜出境四年拜大將軍餘官如
故衛青受詔未入玉門之關竇憲當官猶在燕山之下
公之此授差無慙德渾王叛換梗我西疆巖羗首窺藩

籬携貳公受服於社偏師遠襲揚旂龍涸繫馬甘松二
十五王靡旗亂轍七十六柵鶻奔雉竄既蒙用命之賞
乃奉旋師之樂天和二年被使南征帶甲百萬軸艦千
里江源水起海若乘流舡官之城登巢懸燹吳兵習流
長驅戰艦風灰箭火倏忽凌城公以白羽麾軍朱絲度
水七十餘日始得解衣朝廷以晉尅夏陽先通滅虢之
政秦開武遂始問吞韓之謀是以馳傳追公以為仁壽
城主齊將段孝先斛律明月出軍定隴以為宜陽之援

公背洛水而面熊山陣中軍而踈行首乘機一戰宜陽
衝壁增封五百戶進柱國大將軍司勳之冊也建德元
年拜大司空二年遷少保姬朝三列少保為前疑炎正
五官冬官為北頻煩寵命是謂能賢三年授使持節都
督襄郢昌豐唐蔡六州諸軍事襄州刺史江漢之間不
驚雞犬樊襄之下更多冠蓋既而三湘遼遠時遭鵬入
五溪卑濕或見鳶飛舊疾增加薨于州鎮天子晝凌烟
之閣言念舊臣出平樂之宮實思賢傳有詔贈某官禮

也即以四年四月二十五日歸葬於原州高平之鎮山
屬國玄甲輕車介士一依霍驃騎之禮衛將軍之葬嗚
呼盛哉公入仕四十五年身經一百六戰通中陷刀疾
甚曹叅刮骨傅藥事多關侯而風神果勇儀表沉雄事
親無隱無犯學不專經畧觀書籍兵無師古自得縱橫
青烏甲乙之占白馬星辰之變九宮推步三門伏起天
弧射法太乙營圖並皆成誦在心若指諸掌虜青犢之
兵甚有秘計燒烏巢之米本無遺策西零賊退屈指可

知南郡兵迴插標而待常願執金鼓而問吳王橫琯戈
而返齊地有志不就忠貞死焉世子恭等孝惟純深居
喪過禮對其苦寢則梓樹寒生聞其悲泣則巢禽夜下
嗚呼哀哉乃為銘曰

天齊水合日觀山連兵強東楚地遠開燕五卿咸正三
王並賢靈龍更起燧象還燃自天之德乃祖乃父維岳
降神生申及甫北門梁棟西州雲雨勇讐燕城名題漢
柱公始青衿風神世載猛獸不驚家禽能對劔學千門

書觀六代有竭忠真無違敬愛乃數軍實乃握兵謀澆
沙成壘聚石成圖風雲順逆營陣孤虛靈雨鉦鳴燿火
飛狐淮陰受冊車騎登壇公為上將有此同官下江燒
楚上地吞韓推功玉案定策珠盤天有三堦公承其命
國有六卿公從其政台曜偕輝槐庭重暎匡贊七德謨
猷八柄腹滿精神心開明鏡伏波受賑樓船推轂東道
未從南征不復飲丹有井澆泉無菊功存柳林身在櫛
木移萬及葬提柩山行芻靈隴水哀挽長城山如北却

樹似東平松門石起碑字金生眇眇山河熒熒屑子泣
血徒步奔波千里孝水先枯悲雲即起世數存歿哀榮
終始

周柱國大將軍大都督同州刺史余綿

姓氏書余

為綿氏永神道碑

公諱永字永賓東燕遼東郡石城縣零泉里人也本姓
段昔者昌意陵居初分若水之姓共叔出奔始有京城
之族西河居士蕃魏而却秦北岳將軍威遼而奉晉其

後居於北代則先封遼水備乎史籍可畧而言祖援鎮
西將軍馮翊太守父儒平東將軍持節恒燕朔三州諸
軍事恒州刺史公年裁弱冠即值亂離驅馳關塞之間
早有縱橫之志軍陣方圖無勞聚米山川形勢不待披
圖魏正光五年入仕解褐殿中將軍孝昌三年加龍驤
將軍永安二年授平東將軍都督中堤建義勲謀是先
蒙賞倉泉縣開國男食邑一百戶其年淮淝侵軼南鄙
徵公兵受賑偏師一月三捷昔張遼奄至有

闕

縣開國伯食邑五百戶進爵為侯永熙元年授使持節
車騎大將軍左光祿魏武帝特召入任關內大都督馬
武小心侍蕭王於卧內典韋忠壯陪魏后於宮中于時
賊帥元伯破掠城市西自潼函東綿鞏洛京畿大都督
請馬七千公曰此賊無他策尋自烏散止請五百騎應
手生擒朝廷賞其謀策百姓喜其除害既而喪亂弘多
生民版蕩乘輿西幸宗社北遷公妙識玄象深知歷數
乃與昆弟謀為自全斬西中城主

本傳作西郎將

送首關內蒙

賞平昌

本傳作昌平

縣開國子食邑三百戶大統元年授使

持節都督北徐州刺史平實軍

本傳作實泰

復弘農戰沙苑

河橋公並預元

疑

城身當鋒首謀猷應變備在司勳增

邑八百戶通前合二千戶進爵為沃陽縣開國公授南

汾州諸軍事南汾州刺史十四年增邑三百戶轉大都

督其年授車騎大將軍儀同三司加散騎常侍十六年

授驃騎大將軍開府加侍中尋授恒州諸軍事恒州刺

史又遷雲州刺史昔軒邱分族異姓者十四人鄴邑建

侯宗盟者四十國太祖文帝席卷關河三分天下潁川
從我並有鄉里之親新豐故人非無布衣之舊更立九
十九姓還存十六國舊曹還姓亦綿增邑一千進爵為
廣州城郡開國公尋授文州諸軍事文州刺史國家以
玉門西拒久勞亭鄯陽關北牧多事風塵武城二年有
詔進公都督瓜州諸軍事瓜州刺史是以名馳梓嶺聲
振榆關無雷畏威負霜懷惠保定二年還朝授工部大
夫尋遷軍司馬夏官司武待白露而治兵冬官考工紀

玄雲而授職四年增邑三百戶通前合三千九百戶其
年授使持節大將軍都督治左八軍總管軍事落食朝
登上將暮會小卒事涉交接觀釁而返天和二本傳作四年
以本官領小司寇三度疑有星名天獄八卦有坎象刑
書公繁不秋荼嚴無夏日民知約法未肯以獄吏為尊
吏識刑名無敢以死灰相懼又任左廂第三軍總管仍
被勅將兵馬北道教習韓信入關即申軍令陳農受詔
仍校兵書豈若六郡良家五營騎士懸知正正之旗遙

識亭亭之氣蒙犯霜露旗鼓驅馳俄而遺疾疹至大漸
五年六月十六日薨於賀葛城春秋六十有八將軍死
綏三十行哭都護喪還緣邊追祭九月二十三日靈柩
至於京師皇帝臨喪百寮赴弔詔遣使持節車騎大將
軍儀同三司賀拔軌監護喪事又遣使持節車騎大將
軍儀同三司紇豆陵亮冊贈使持節柱國大將軍同華
宜敷冊五州諸軍事同州刺史謚曰基公其年十一月
五日葬於京城南高陽原高司里夫人赫連氏兗州刺

史悅之女年十四適余綿氏冊拜魯城縣君遷濟陰郡
君又遷廣城國夫人肅恭令淑儀範賢才四德有耀三
星增輝三公夫人見於斯矣建德元年十二月亡春秋
五十有八二年正月歸於高司之塋劉荊州之墓合葬
於襄水之陽衛將軍之陵同穴於廬山之下嗚呼哀哉
世子岌使持節儀同大將軍領兵部大夫純孝事親忠
貞事國禮義自立聲名有焉銘曰

軒臺受氏若水降居西城仲肩北陸寘餘山川雄烈風

俗扶踈昔我關塞沁襲干戈時遭拔木世值橫波北封

代郡東據遼河地未平一天猶薦瘡我父

疑作公

重光繼

文踵武總牧三蕃兼治六輔雅俗觀風都亭待雨不逢

問吏無閤桴鼓公以載世挺此令閭孝有三德忠惟一

君馬陵釋惠聊城解紛兵防蒲月戰避迎雲長松都尉

細柳將軍既牧淮海且蕃恒代高壁負關長亭穿塞疊

鼓司盟吏不能欺兵無敢背玉關遺矩汾海留愛大將

軍受冊公昇其壇六卿咸事公貳其官夷陵燒楚上黨

分韓營軍叅合校戰臯蘭年深厲起福禍災生上台裂
岳次將星傾赤地悲淚白虎哀鳴懸弓靈幕繫馬塞垆
烟凝不動泉凍無聲天子愴然追於贈謚禮官賜冊陪
陵受地印綬曰策衣衾曰襚玄窆就列黃腸在位自此
何世從斯幾春樹為櫪疑作櫪見莊子社陵成谷神詎知雲閣
名在功臣

文苑英華卷九百五

欽定四庫全書

文苑英華卷九百六

宋 李昉等 編

職官十四

諸將
軍三

周車騎大將軍賀婁慈碑一首

唐左將軍魏哲碑一首

後周明威將軍梁待賓碑一首

周車騎大將軍賀婁公神道碑

庾 信

昔者軒邱命氏初分兄弟之姓若水降居始建諸侯之國自是以官為族因地為宗水派枝分其可知矣公諱慈字元達本姓張清河東武城人也仕於周張仲為孝友謀於晉張彥為賢臣韓有開地則五世強國趙有孟談則三卿不戰祖慶少習邊將憑伏智勇雖復五車行簡不取博士之名一卷兵書即以將軍自許角端在手必無齊魯之侵蓮花挿腰甚得蛟龍之氣為車騎大將軍儀同三司散騎常侍霸城開國伯贈河州刺史父瓌

公子公孫有鎡基於天下良弓良冶有世業於家風書
則百家可知劔則千人可敵三槐以鼎象物知其神
奸五等以桓珪旆疑瑞守其宮室君以才望兼而有之
終於使持節車騎大將軍儀同三司散騎常侍武定縣
開國公贈東河州刺史兼山岳之靈受星辰之氣年在
髫髮甫就勝衣竹馬來迎已知名於郭伋羊車在道即
見賞於王澄豈直童子明經書生說卦而已至如禪河
清論秋水高談故以辨折龜林聲馳鹿苑國家官族君

為首姓起家車騎大將軍儀同三司襲魯為公邑合一
千六百戶弱冠登朝傳呼甚寵漢魏台鼎故無此比中
朝方伯罕有其年大冢宰任總機衡是勤王畧惜君忠
壯委以爪牙鎮左廂親信出梁州防主華陽西極漢水
東流巴濮既寧沉黎即靜保定四年王師北伐以君驍
勇被召將兵師下宜陽身登函谷將燒白馬之城以覆
鳥巢之壘既而中途甚雨未獲圍原軍師聞喪不成侵
宋柱國趙王今上之第九弟也文則河間上書武則任

城置陣作鎮岷邱陽旂

一作軫

錦水白虎之俗難安黃龍

之盟不定以君智畧入佐中權天和元年授使持節大
都督治柱國摠府司錄仍轉司馬餘官封如故相如西
喻鏤石於靈山武侯南征浮舡於瀘水方之今日彼獨
何人九品課工為上之下四年入朝歸事宰旅即受載
師大夫將命齊國尋盟出境即用和隣入國聞喪仍從
會葬之禮可使南面此之謂乎尋以本官入治軍正至
如渭水兵書存心為志軒邱陣法聚石成圍既得師不

疲勞兵無怨讟入陪中禁更領儀同邸客城池門闌戶籍咸資巡警並用司存帝城近臣公室密戚如逢司隸似畏都官既而孤城鄭嫗不相其年巴水深翁不醫其疾春秋三十有三奄捐官舍呂子明之疾甚歎軫吳王阮文瑜之長逝悲深魏主有詔贈某官禮也以建德四年三月日歸葬於河州苑川郡之禁山公六郡良家西河望族地壯金行人雄塞氣兵書七卷河水浮來射法三篇天弧夜下鋒旗不息刁斗恒驚猶得馬上讀書軍

中習禮太史子儀善於謀策諸葛公休長於撫馭四代
儀同三司七世河州刺史鍾鼎成烈冠蓋連陰謂生為
貴臣死為貴神者也但以遊魂久客反葬途遠道阻山
長妻孤子幼哀聲滿野愁氣連雲况復松檟飄颻方臨
武威之戍丘陵迴遠直對臨兆之城馬援亡於武溪尸
柩返於魏里梁鴻死於會稽妻子歸於平陵嗚呼哀哉
嶮崎遠矣昔者繁昌祠前即有黃金之碣德陽基下猶
傳青石之碑是謂勒功乃為銘曰

七葉佐漢五世相韓忠臣入仕孝友當官青城仙洞黃
石祠壇臺堪走馬書足迴鸞武定風颭霜城嚴肅並馳
雙傳俱分兩行重世刺舉連鑣袞服草靡青邱風馳赤
谷世不乏賢挺茲上嗣孝有三德忠無二志劔足身挺
書堪面試矜節既秉高蟬且珥龜轉印函蛇盤綬筭左
右將軍前後常侍繼踵五侯因循三事矜旃九坂艦舳
雙流還驅木馬更引金牛江波錦落火井星浮蹲酒望
帝安歌蜀侯受服河陽偏師洛浦置陣成臯連旗廣武

朝兵滅竈夜營多鼓箭起六麋鋒摧九虎倏忽人世俄
然今古崇發兩星暨驚二豎遊魂通夢言返舊塋紫泥
賜冊黃腸贈行途登石紐路入金城寒關樹直秋塞雲
平劍埋合柱書藏鑿楹武侯為廟樂公為社雲蓋低臨
電裳紛下碑枕金龜松橫石馬永矣身世留名華夏

唐左將軍魏哲神道碑

楊炯

天經地緯

集作經
天緯地

之帝求

集作
秩

制禮作樂之才撥亂反

正之君資拔山超海之力繼韶夏而崇號謚非無陣戰

之風披皇圖而稽文武

集作帝非或咸非

用干戈之道故能

彌綸宗廟彈壓山川苞四海以為家一六合而光宅是

以二十八宿懸列將而察休徵三十五星聚天軍而赫

符彩呂望垂竿於渭溪道峻匡周張良授策

集作履

於圮

橋功崇佐漢乃有心如鐵石氣若風雲洛讖書名

集作名書

河圖秘象青聯

集作絲

雷燭歷大塊以三休碧羽霜淒倚

渾

一作暉

天而一息岑彭許允征南鎮北之名馮異王昌

大樹中軍之號杜太行而泥函谷猛氣無前戳封豕而

斬長鯨雄圖不測元戎十乘驅衛霍於前矛甲士三千

集作
千人

列孫吳於後殿秋風白露執金鼓而齊六軍太山

黃河折銅符而光百代建廟堂之策為社稷之臣孰能

與於此乎在我真將軍矣公諱哲字知人鉅鹿曲陽人

也七代祖靖非前秦征北大將軍鎮北地上郡其後子

孫因居

集作
家

於寧州襄樂縣開國承家之始誕姓命氏

之源大名發於本支當途峻於

集作
其

層構三辰鬱鬱天

街分畢昴之都九野茫茫地險列

集作
裂

山河之境丞相

以萬機論道匡大運

以集作而

震威嚴尚書以八座當官

贊金行而標領袖文昭武穆方駕齊驅公子王孫朱輪

華轂大鵬垂翰馭風伯而指南溟天馬騰姿偶

集作按

雲

師而集東道祖唐隋天水郡丞河陽都尉瑤林瓊

集作玉

樹擢標格以千尋圓折方流委波濤而萬頃雄飛有望

豈惟京兆之丞陰德不憊何直丹陽之尉父寶皇朝通

議大夫總管府司叅軍事東家孔子至德生於上天南

國申侯明靈誕於中岳居

集作君

朝翊贊道先王之法言

公府弼諧對上天之休命若夫聖人作而萬物覩元首

明而庶事康日月粲其光華山川鬱其雲雨則有英靈

間出丹陵諧白獸之旌

集作祥

符瑞挺生黑帝感蒼龍之

傑隋珠一寸魏后揚眉和璧千金秦王動色顏生殆庶

聞於竹馬之年揚子參玄發自銅車之歲建情峯而直

上疏筆海以橫流彫墻則百堵皆興峻宇則千門並列

可大可久無忘簡易之途為子為臣率由忠孝之境郭

林宗之披霧豈敢名言孔文舉之欽風每相推薦若乃

五才

左傳作材

並用誰能去兵七德無施止戈為武出師於

九天之上暗合兵書取法

集作睽

於十日之前懸符射法

固以文武之道揄揚滿於城中將相之才籍甚聞於海

內貞觀十五年起家補國子博士

集作學士

喬

集作環

林掃日

驚白鳳於詞條壁水澄天駭彫龍於義壑班超慷慨常

懷萬里之心李路平生每負三軍之氣十六年勅授左

翊衛北門長上祿賜同京

集有官字

仍令為飛騎等講禮鄧

司徒之舊事馬上讀

集作坡

書祭征虜之前聞營中習禮

宮

集作杏

花如錦還臨拜將之壇槐葉成帷復對聞軍之

市自皇王眷命大帝應期運璇衡而制八方調玉燭而

臨四極玄菟白狼之野來奉衣簪蟠桃析木之鄉尚迷

聲教太宗文皇帝操斗極把鈎陳因百姓之心問三韓

之罪勝殘去殺上馮宗廟之威禁暴戢兵

一作姦

下藉熊

羆之用公丹心白及本自輕生六郡三河由來重氣烏

江討逆剖

集作剖

項籍於五侯涿

集作鹿

野懲奸磔蚩尤於

四宰

集作豕

二十年詔除游擊將軍右武侯信義府右

集作

左果毅都尉長上如故顯慶二年以內憂解職痛深吳

隱哀

集作禮

極顏丁踏厚地以崩魂訴高天如泣血紫泥

垂渙頻降雨書墨纒

集作紱

臨戎遂從金革三年詔除左

衛清宮府左果毅都尉尋圍谷府折衝都尉並長上如

故又以應詔舉對策甲科遷左騎衛郎將于時長榆歷

歷烽火猶驚高柳依依邊風尚急關山夜月遂為毳幕

之秋西北浮雲翻作穹廬之景

集作氣

四年詔公為鐵勒

道行軍總管陳兵玉塞按節金微學常山之蛇擬麗譙

之鶴

集作
鶴

鍾鼓嘈噴上聞於天旌旗繽紛下蟠於地伏

尸百萬因瀚海而藏舟闢地數千即燕山而築觀武臣
雄略氣懾西零神將宏圖威加北敵麟德元年詔遷左
驍騎中郎將尋檢校右監門左武衛將軍本官如故昔
者封禪陟雲亭之後七十二君圖書出河洛以還三千

餘歲振兵釋旅方崇薦帝之儀道洽功成必致禋

集作
因

天之禮粵以皇家闢統之五十年今上開基之十七載
登封告禪玉謀金繩建顯號而施尊名揚英聲而騰茂

實華夷輯睦皆承萬歲之恩朝野歡娛咸奉千年之慶
乾封元年詔加明威將軍本官如故大風遺孽叛換青
邱小水殘魂憑陵碧海率百官於文祖尚興彭蠡之師
會萬國於塗山猶有防風之戮是歲也詔公為遼東道

行軍總管營雄

集作軍營

對日兵氣橫

集作浮

天開玉堂而按

部坐金城而勒陣闕鞏之甲犀兕七重艖艎之舩舳艦

千里駕鼉梁於聖海秦皇息鞭石之威泛鼈鉤於仙洲

愚叟罷移

集作拔非

山之力然後風行電卷斬將屠城塞丹

浦之遙源伐黑

集作
拔緣

林之奧本王孫公子

集作何
孫曰子

名霑

皂隸之臣深

集作
澤

谷太山境入樵漁之囿二年詔加上

柱國仍檢校安東都護導之以德齊之以刑威振六官

風揚五部兵戈載戢無勞尉候之虞桴鼓希聞寧有穿

窬之盜仰太陽而晞湛露方預四朝臨逝水而急寒風

俄悲一去齊

集作
薛

孟嘗之下淚高榭曲池魯司寇之悲

集作
行

歌頽山壞木長安杳杳

集作
眇眇

還符日近之言京兆

悠悠理

一作
竟

絕天高之間紫關生入判自無期繡服危

集作還竟知何日總章二年三月十六日遣疾薨於府

第春秋五十有四嗚呼哀哉詔贈左監門將軍禮也唯

公被服忠孝周旋禮樂仁者見之謂有集作仁智者見

之謂有集作知研幾冊府金滕玉版之書索隱兵鈴玄

女黃公之法每建旗推轂三令五申躬擐甲冑親當矢

石軍井未建集作如臨盜水之源軍竈未炊似對嗟來

之食由是南馳北走東討西伐集作擲集作之無旁按

之無下載匡集作宮裏遙登將軍之壇集作

集作載匡漢書

天文志作載匡隋

閣飛星

集作旗

邊獨列

集作踐

中軍之位雖龍泉匿字薰歌

光沉而麟

一作鳳

閣飛名天長地久夫人扶風氏隋濠州

刺史

闕

之孫也五松春艷牽少女之祥風八桂秋雲降

仙娥之寶魄謝家之子歌柳絮而知慙劉氏之妻頌椒

花而自恥三周按禮無虧內則之風四德揚蕤載闡中

閨之訓宿盤

集作蟠

龍於月境

集作鏡

早沒鸞床

集作林

矯飛

翼於霞樓先沉鳳穴珠星璧月終陪季子之階金鼎銀

罇竟列齊侯之寢以貞觀十五年五月五日終於某所

越咸亨元年某月日祔於某原長子瓜州司倉擇木次

子右

集作左

衛親衛玄封等門傳萬石庭列雙珠花萼爭

榮芝蘭藹秀

集作疊藹

天經地義欽承避席之談日就月將

虔奉趨庭之教變槐檀而瀝膽木石悲酸代露霜以崩

心幽明感動葬之以禮登之以時生民

集作人

之本盡矣

死生之義備矣孝子之事親終矣於是門生故吏共緝

家聲才子文人思傳盛德庶使藺相如之壯

集作生

氣歷

千載而猶存隨季

集作武

子之餘風盡

集作登

九原而可作

其詞曰

文王受命畢公餘慶玉樹聯芳金枝疊映三分並列七
雄齊競建國承家重熙累盛功宣蹈舞德流歌詠河洛

垂文山川吐

集作出

雲驪珠育照虹玉呈文

集作氣

直立孤

聳天然不羣棲遲膠塾悅懌

集作敦閱

邱墳恥為儒者自許

將軍伊初不懌軒轅討逆陣擁遼河岳鎮

集作屯

碣石班

超投翰揚雄執戟弓合三才刀長四尺爰清尉侯載澄

疆場得人者昌失人者亡皇恩俾乂帝曰明敷幽桂含

馥滋蘭吐芳承天待詔觀國賓王茂實集作續斯遠音聲

一作華

克彰鵬池淼漫鷄山禍亂出閩集作門辭家夷凶靜

難金微瓦解玉亭水泮扈駕命旋集作天門陪祠日觀萬邦

胥悅千齡啓旦斗骨危城占蹄舉兵丸山霧塞渤海波

驚帝赫斯怒王師有征虔劉北貌疑作循集作類戡剪東明遵

以文軌宣其德刑太微上將文昌貴相非熊非羆令閭

令望寵踰軍幕榮叅武帳本謂來朝何期返葬原野蕭

瑟風烟悽愴天道如何吞恨者多松風夜響薤露晨歌

秋月如練春波

集作雲

似羅榮華滅後寒暑經過青鳥邱

隴白馬山河

後周明威將軍梁公神道碑

蓋聞君為元首臣作股肱或論道三槐或折衝千里至
有道存俎豆藝總干戈高視翰墨之英猶布爪牙之旅
究青編於學府業有多聞受黃石於兵符筭無遺策故
得九功咸叙七德攸彰文武不墜公實兼美公諱待賓
安定臨涇人也竦以英才遠邁知州縣之徒勞鴻以抗

節遐征覽帝京而有作由是五噫標興播金石而騰徽

七貴承榮綰銀黃

一作璜非

而叠茂貞規盛烈映史凝圖粗

紀詠歌無俟詳確高祖禦後魏駙馬都尉侍中少保金

紫光祿大夫揚州總管贈太尉謚昭公食邑二千戶銀

榜增輝玉壺流渥位隆三少化浹五胥既而幽壟埋魂

終降槐庭之贈高門納駟式居茅社之封曾祖睿宇文

周駙馬都尉鄜秦二州總管光祿大夫兵部尚書隋益

州總管蔣國公贈司空食邑三千戶白水時清乳武之

謹行息光祿武垂異扣馬之諫必申加以主西子之羣
英名高八座遵文翁之遺訓學富三巴茂先榮級忽光
泉壤漢祖寵章永有帶礪祖演隋沙州刺史上柱國公
踐仲寧之餘躅奸邪歛手疑孝仁之遠蹤羣克革面
連州跨郡邁陶氏之隆基開國承家掩張門之累葉父
贊隋左千牛備身驪山府上騎上柱國唐朝豐王府諮
議雲州司馬冀州長蔣國公襲良弓於簪笏榮侍紫宮
翼雕戟於巖廊肅趨丹地西園坐譙疑作
呂明月而飛

文北土行康望浮雲而展足公漸潤膏腴發靈川嶽七
年可識抱杞梓而呈才千里見知負騏驥而騁駿靈臺
遠鑒與霜月而齊明智府弘深共烟波而等曠踐仁義
於區域白璧已輕許然諾於樞機黃金豈重因心孝友
宜於自然率志謙冲得乎而疑作性不脂常而求達不
詭計而自媒被玉軸之文章三冬遽足窮金壇之秘訣
百戰不孤譽滿寰中聲蓋天下而學優將仕允屬名家
欲昇鴻漸之姿終佇鶴鳴之問以唐朝麟德二年補左

親衛從資例也屬金甲出戰玉帳論兵從命文昌問罪
遼碣公提戈赴海投筆從燕智者有謀仁者必勇孤鋒
直進九種於是克清足馬橫行三韓由其殄滅疇庸賞
最我有力馬俯浴恩波泛承勲級即綬上柱國公深漸
位薄命舛數竒雖霑勒石之勲未展披堅之効嗟呼揚
子雲之才藻空疲執戟馬相如之文詞猶勞武騎今古
同貫夫復何言既而從牒隨班牽絲闕務起家拜朝議
郎永淳元年正月三十日一無此字授伊州伊吾縣丞非所

好也路

闕

金河途連玉塞塵沙共起烽火相驚秋草將

腓胡笳動吹寒膠欲折敵騎騰雲公佐佑多方掌司攸

寄服叛懷遠擒奸擿伏於是寇敵不敢窺邊歌頌因茲

湓境曾未暮月正

疑作改

令大行特簡帝心超居不次永

淳二年二月四日制授昭節校尉守右衛蒲州府佐果

毅仍令長上兼於上陽洛城等門供奉公洞曉戎章妙

詳兵律軍國是賴戎幕允歸由是徼道長巡嚴扃每奉

朝求夕警不怠於風霜善投能防更申於閑阜其年十

月七日奉勅命於仗內祥麟廐檢校馬公識高東野職
叅西極勵銜策而追風逐日加剪拂則絕電奔星駛駢
將駙馭齊銜驥騮共駒駉伏櫪於是龍媒間出麟友挺
生伯樂多謝於精微日碑有慙於秣養恩制褒獎又加
崇秩文明元年二月二十日遷游擊將軍仍依舊長上
大周革命兩儀開闢爰覃作解之恩式暢惟新之典勤
勞夙著體望允歸拜職遷榮寔符僉議天授元年九月
十六日加威武將軍守左玉鈐衛翊善府折衝都尉依

舊長上封安定縣開國男食邑三百戶公祇奉王庭職
司兵衛八屯由其增峻五校於是克宣翼翼兢心積劬
勞於歲月勤勤忠志懷跼蹐於序時憂能傷人竟成沉
疾以長壽二年正月六日終於神都旌善里私第春秋
五十惟公弱不好弄卓爾不羣九歲明詩七齡通易月
初能對即習黃童目不相訓還慙夫子經耳不忘歷口
不遺性沉深有器度能個儻無拓

闕

重交友雅愛林

泉月幌風襟每吟謠於牋綵花新葉早必賞會於琴樽

加以啼猿落鴈之奇鸞驚鳳翥之妙瀉水懸河之辨背
碑覆局之精標映前哲公實多敏至孝過人雍和絕俗
事父母則造次不違友第兄則溫柔必盡既風樹興感
霜露纏悲聿脩之德惟新欲報之恩罔極虔誠大象弘

誓小年

疑作
兼

廣樹慈仁庶憑因果月抽官俸日減私財

並入薰脩咸資檀施故得雕檀之妙俯對禪龕記葉之
文式盈梵宇粵以大周長壽二年歲次癸巳二月辛酉
朔二十四日甲申遷窆於雍州藍田縣驪山原舊塋禮

也葬事之屬一皆官給鼓吹儀仗

一作事儀

送至墓所墳開

白日終留恨於滕城禮被皇家忽霑榮於霍隧嗚呼哀哉嗣子左千牛去疑哀纏泣相思結飡荼仰庭禮而不追覩極書而增慕恐玄穹倚杵碧海成桑敬勒貞堅乃為銘曰

大哉嬴國遠矣少梁與秦同祖今則夏陽爰暨伯翳胙土惟良自茲厥後人物克昌逮乎漢朝令望不已三至連輝七侯承祉或顯或晦有文有史烏奕珪璋芬芳蘭

芷少保名揚司空道泰惟祖惟禰蟬聯軒蓋挺生令則
在邦之最卅歲騰芳髻年超靄君號神童晚稱英傑佩
仁服義又明且哲七步立成五行不輟家惟萬卷常實
三絕詞高許下學富淹中志惟謹潔心亦冲融温淳植
性朗潤在躬閨門禮洽朋友財通思若雲飛辨同河瀉
兼該小說邕容大雅武擅孫吳文標董賈樹下啼猿封
中試馬且文且武闕登位海隅不賓命我偏帥既陪
勒石還從飲至輔翊百里褒昇佐貳既總兵權入司宮

掖徼道宵警禁門曉關式重其駮載懷斯癖我馬既良
我軍既雄折衝千里趨奉九重行承芝詔坐啓茅封恨
深負朱榮啓擊鍾爰持戒律思答慈容將福有徵謂仁
必壽如何淑德遭此凶咎孺慕崩心惇嫠宿首泉扃一

間

疑作
開

天長地久

文苑英華卷九百六

欽定四庫全書

集部

文苑英華卷九百七
九至

詳校官庶吉士臣龍廷槐

助教臣常循覆勘

總校官進士臣朱 幹

校對官助教臣羅萬選

謄錄監生臣倪景寬

欽定四庫全書

文苑英華卷九百七

宋 李昉等 編

職官十五

諸將
軍四

冠軍大將軍郭知運碑一首

右羽林將軍王君奭碑一首

右羽林將將軍臧公碑一首

冠軍大將軍郭知運神道碑 張說

四序

集作
時

平分清秋之氣勁
五方異俗崆峒之人武故

隴上多豪山西出將其有雲龍感召星象特生金鼓登壇隱如敵國麾幢指塞自比長城得之於太原公矣公諱知運字逢時其先太原著姓今則晉昌人也本乎文武之弟是為號叔號或云郭因而氏焉自燕昭尊隗以築宮漢祖封亭以列國其侯于陽曲宅彼太原舊矣亭之玄孫友從太原徙隴西昭帝分隴西置平郭氏又為郡之右族友之昆孫武威太守憲憲之猶子散騎常侍芝其有名迹見於魏晉則晉昌諸宗散騎之後也爾乃

一門連譽時人號曰三儒四海名齊天下謂之八顧光

祿派分於馮翊廷尉世茂於潁川孝則天錫釜金忠則

帝彰

集作章

冕服仁則猛獸不害信則童兒不欺豈但介

休見有道之碑畧

集作洛

陽聞立德之傳而已曾祖欽瓜

州大黃府統軍上柱國祖才朝議郎瓜州常樂縣令上

柱國父師朝散大夫上柱國贈伊州刺史磧鹵之地戎

馬生郊業戰鬥而取

集作弘

勲仕州縣而為達啓莫京之

繇福不在於其身積無窮

集作聲

之善慶必流於後嗣公

太白之精雷泉之靈鷹家之禎為國而生身長七尺力
能扛鼎猿臂虎口虬鬚鶚瞬射穿九札劔敵萬人子卿
路逢遙識將軍之相唐舉一見足辨封侯之骨解褐以
善戰授昭武校尉秦州三度府左果毅以敗敵集作北敵

庭加游擊將軍沙州龍勒府折衝兼右金吾郎將瀚海
軍副使尋改朝散大夫伊州長史伊吾副使以軍累破
虜即授其州刺史進當軍經畧使朝廷以未愜前除且
有後命遷左金吾三字集作本衛中郎將仍舊為州軍使默啜

之寇北庭也公奔命解圍軍聲大振加雲麾將軍

集無此字

右府衛將軍封介休縣開國公食邑三百

集作三千

戶開元

二年吐蕃入隴右掠坳牧公兵以奇勝寇不復蹤積甲

山齊而有餘牧馬谷量而未盡歸功廟筭朝議多之授

左

集作拜右

羽林將軍持節隴西

集作右

諸州節度大使兼鄴

州都督河源軍使鎮西陲信國之藩屏坐北洛亦王之

瓜牙故入奉期門而出寄分閫

集作出分閫寄

於是料敵無備

間其師老潛軍一舉大俘九曲鎖甲文劔燹馬犖牛既

獻戎捷遂頒朝賜乃兼鴻臚卿攝御史中丞改封太原
郡開國公加前食邑三千戶執憲總軍典屬乘障增爵

益邑遇厚恩深俄而六州羣部相率大叛命公統隴右

之騎濟河曲之兵

集作師

鋒鏑爭先玉石俱碎拜左武衛

大將軍授一子官賜金銀器百事雜綵千段旋軍

集作班師

臨洮遭茲虐疾嗟呼匈奴未滅宿志不申生也有涯死

而猶視開元九年十月二十三

集作二

日薨於軍舍春秋

五十有五蕃夷邊鎮血面椎心悲慘風雲號慟山谷豈

非良將視人如子人亦視猶父乎皇帝閱焉詔贈涼州

都督米粟五百石錦帛五百段命都水使者張景洪集作

供備物護葬遵朝典也惟公氣猛而性和量寬而精銳

沉謀可以掩著蔡雄斷可以奪鬼神故常糴糶鈴芻

狗風角然其樹恩結信立威用武怛然集作如風濤震

蕩如雷雨戰必勝集作攻必取每有奏謁帝特稱嘆孝

文之得魏尚虜不足憂太祖之見郭嘉知成吾事前後

賜集作錫錫錦衣寶帶文馬素女爛其盈門長鳴在廐感知

已之主陳必死之力皇情西顧則九羌疊鼓詔書北伐則六狄焚旗上成聖君之玄鑒下効武臣之素節其意

集作竟

也如此夫為人子立廟致敬祖考來格不亦孝乎

為人臣恢疆禦侮以勞定國不亦忠乎若然者歸義方於先人揚令名於後代可也嗣子英傑起復定遠將軍

左領軍衛翊府中郎將借紫服金章隴右經畧

集作河西節度

副大使英奇朝散大夫前尚輦奉御英協游擊將軍前

京兆勵行府右果毅都尉英彥朝議郎行右

二字集作前左衛曹

曹叅軍等咸善居喪而過哀哉從王事而奪禮則知辛

賢父子繼位將軍祭彤兄弟並叅戎律知本不忘

集作去本

不達也而新是謀權也嘉此武功創其宅兆以十年七

月葬我公太原夫人燉煌索氏祔焉禮也皇上念功以
惜逝厚終以遇存有詔詞人為其碑誌介士送葬即封
征虜之墳單于入朝當祭度遼之墓銘曰

泐泐

集作泐泐

將軍雄畧冠郡平西征北震戎壘獯亭障

闕

鼓屯田饋軍伏茲

集作此

白刃致彼青雲郭侯讌喜既多

受祉玄社

集作社

黼衣清廟蠲祀鼎食金奏炮鼈鱠鯉即

集作既

來不庭有嚴天子流沙博望羽林飛騎集作騎飛河曲

迴兵臨洮舊防手握金節魂沉玉帳千里送喪三軍悽

愴詔塋禮崇樹碑恩豐

集作恩碑義豐

生為神將死為鬼雄身

世一滅榮華萬空祁連之墓長旌武功

右羽林將軍王公神道碑

維大唐開元十五年九月二十三日庚申右羽林大將軍持節河西隴右兩道節度營田九姓轉運十副大使

兼赤水大使專知節度事攝御史中丞判涼州都督上

柱國晉昌公薨於鞏范

集作范

亭故也夫事君効命之謂

忠殺敵榮親之謂勇干星襲月之謂氣逐日拔山之謂

力有一於此名猶蓋代矧兼其四人何間焉是晉昌所

以錯落將星崢嶸山嶽者也公諱君奭字威明瓜州常

樂人也父壽因公建績致位九卿臨難守死褒贈特進

審塞翁之倚伏達家叟

集作勝
賤非

之俘休老而益壯歿而

名位者矣公威聲發於雷泉武義標於峒嶺小頭銳上

猿臂虬髯

集作鬚

龍劍摧

集作淮

百勝之鋒地予得萬人之

敵拔自行軍

集作陣

果有呂蒙之才拜於壇場不爽韓信

之用始仕鎮戍歷班外府及即將中郎至軍副率雖驟

移官守而恒在疆場郭知運推轂河源握符隴外

集作古

公未登一命事主將之旌麾不出十年代總戎之節鉞

慷慨之士以為美談於是自驍衛將軍遷羽林大將軍

既督隴右兼統河西綰塞垣之十軍佩節制之兩印大

田多稼而屯廩百億蒐乘藉馬而鐵騎數萬乃蹈赤山

焚罽幕獵青鳥驅犂牛喑鳴則七戎避勇

集作辟易烜烜集作

赫則千里震動亭候恃其長城廟堂賴其神將月獻戎

捷歲行軍賞王侯無種屠狗起於將軍戰伐有功爛羊

超於都尉前後翻飛幕下奮躍行間跨軍曲郡腰金冠

玉者數十百人矣每至入朝奏謁升殿論邊山川險易

立成於聚米攻守方畧一決於前籌遙詔置兵先合於

漢光之旨親書從事暗同於魏武之心故得延譽上騰

風雲鬱其氣色恩華下沓日月借

集作供

其光輝當斯時

也躊躇攘袂三重可以氣壓百蠻可以力制即叙者先

生之常談和親者豎儒之怯一時持計定足為神武非常

之主道哉誓請先收犬戎次擊獯鬻盡區域於西海闢

郡縣於北荒輝皇靈於天外圖壯節於雲閣其事如果

曠古未儔惟君知臣俾集作保斯言之可復何神與善負

厥志而無成是年秋八月吐蕃犯邊瓜州失守盜憎吳

將執政集作致是其親公以為背父立威非孝也頓兵縱敵

非忠也大義逼而忘家方寸亂而供國其定計也成列

而出討賊盡狄而退殺身忠在孝先將之道也公馳驛
要謀而迴紇內叛以八九之從人當數百之強虜然猶
虓噉擊射殺傷略半勢孤兵盡流矢橫及所謂朴而餘
威折而不撓矣嗟呼嘗膽之憤空結噉肝之怨莫讐言天
子聞之默然興歎人言以命闕國夫豈忘其言哉苟收
必死之忠焉問不虞之過至矣集無此字蓋聖主推恕心集作
仁恕於天下懸大信於後人愛欲其生戀集作戀是晉侯再克
之喜惡傷其歿抱秦伯猶用之誠婉獨見之端豈常情

所逮謀臣飲恩於望表猛將感德於事外然後任人之固
衆可知也乃下詔追贈特進荊州大都督禮命窻窻加常
二等死事之經也公之伉儷曰武威郡夫人夏氏韓母築
城之智孟光舉白之才拔棘解圍三軍懾其健婦崩城慟
哭四海傷其孝妻此又伐間集作間之一竒一家之兩絕者
也嗣子尚衣奉御承榮天獎賜蘭星祥名寶禮義形於橋
梓哀戚過於纓麻稟訓帷堂克持門戶特奉恩旨收其二
蔭飾柩玉關歸魂上國以十六年十月詔葬於萬年縣見

子之原鹵簿齊列方相雙引京尹護喪史官頌石千乘
送葬觀騾騎之威儀十里開塋識龍驤之丘墓銘曰

合衆在仁正兵維義將為天目國命所寄曲乃老師輕

實兒戲安我封畧才難不易赳赳將軍貔貅絕羣超騰

白地騫翥青雲朝盛勇爵時稱集作家戰勲衆考飛舉集作

衆聲帝曰子聞子聞伊何甲兵繕肅屯積萬庾馬量百

谷甘心犬戎指掌獯鬻大軍集作畢是當跣單于可掬壯計

先達王師未張城墮孤塞寇及高堂前忠後孝集作忠先孝後

拒敵而忘外仇易復內變難防克日將戰呼天不假岑

彭詐客張飛帳下流矢

集作鎬

何人交錢去馬蒼黃反復

哀哉命也美殮姑

闕

寵歸芷

集作芒

陽東都門外南登路

旁高墳纍纍列樹行行父子同兆何殊改

集作故是

鄉詔刻

金石義形意氣隱善必書殤魂不諱事棄忠在生輕節
貴嗟爾明靈銜恩水慰

左羽林大將軍臧公神道碑

李邕

夫兵者天之威將者人之命非武功不足以遏虐非智

勳不足以視師故四朝簡才三邊受畧百姓拉之如朽

五變轉之若丸橫大漢而左迴出高闕一作門而右去單

于惟勳一作懷柔以納質匈奴辟易以破膽數騎深偵解鞍

却敵入陣周迺搖扇坐謀矧乃大誰羽林離衛宸極蓄

志堅石誓心渥丹捧日廓於九霄戴天旋於四孟千年

聖主幸而逢之一代勳臣鮮哉稀矣公諱某字時明東

莞莒人也其先泝於后稷演於周公洎魯孝公臧因而

為氏昔僖伯諫隱觀魚哀伯諫桓納鼎魯多君子視履

考祥是以知其有後矣降自璋漢城陽王太傅暉蜀郡太守混晉東海內史曾祖滿府君隋銀青光祿大夫海州總管東海公祖寵府君皇朝請大夫靈州長史襲東海公考德府君皇朝散大夫原州司馬贈銀州刺史上柱國莫不納忠詞光訓彞則大乃嗣種德在人子孫並於昌時龜組疊於榮問公濬發卓犖雄舉倜儻風雨之氣凜凜出徒金玉之聲鏘鏘激物問家以廣孝形國以盡忠朋執義之昆弟友之雖文忠老成而壯武特立自

左衛勲應穿葉附枝舉登科授左玉鈐翊府長史始足
下也尋以天驕送死勝府纏兵占幕出奇衝突闕敵遷

鴻州長道府左果毅仍長上恩獎充平敵軍都虞侯總
管轉左衛陝西州華望府左果毅長上屬雜虜侵別將
掎角橫戈棹戰匹馬飛行拜游擊將軍本府折衝都尉
仍長上公自任邊事每讀兵書山川之形不勞聚米戰
陣之勢有以成圖驟施交賢博文求已習明已至用弘
畧以壯猷故兵部尚書同中書門下三品平章事韓國

公張府君年位不侔志業相許引之入幕辟以論兵抗禮肅庭握手密坐嘗謂人曰此子才經文武識匹孫吳逸翮將搏巨鱗必縱雖趙有李牧漢有衛青練彼朔方勦于獯狁無以居其右也由是聲聞于天威震于朔凡欲追討皆藉率先洎單于紹親間道畧地絕沙漠冰河公乃連馬拽柴多旗具火詐示遠擊為出分軍敵以表裏驚疑沮歟奔散轉懷州南陽府折衝都尉仍長上朝議以元功未塞後命載加遷寧遠將軍左領軍衛懷州

景福府折衝仍長上充大武軍遊奕副使除定遠將軍
大衛雍州通樂府折衝仍長上充大武軍慶加明威將
軍本衛左郎仍充東受降城副使公以敵騎應來備預
宜速出敵不意惟我有謀乃毒以井泉焚以草莽中休
罔以秣馬夕炊罔以汲人敵歎曰可北而不可以南可
望而不可以至公之謀也累加宣威將軍使仍舊載遷
忠武將軍左郎將兼安北副都護匈奴以地闕援孤士
寡糧絕蟻附城下雨射城中公乃偃旄麾匿金鼓懸門

不發衿甲不陳匈奴且夕却軍遲明出塞以功遷單于
都護借紫金魚袋公以北鄙禦寇中道扼喉生門以携
之死地以誘之覘其西也將驚其前察其東也將襲其
後匈奴進退岐路迴旋二年議者以為約之不以長繩
固之不以陷穽非公用智全勝按甲養兵安能預於此
恩制加銀青光祿大夫單于副大都護兼朔方軍副大
總管上蔡縣開國男公理兵戒嚴撫下勤至感恩挾纊
攝威陷疑作陣匈奴不南牧職公之故也拜靈州都督

兼安軍經畧大使兼朔方軍大總管上蔡縣開國子匈奴利於馬牛指於靈夏嘗以三城分守上將專征議雖畫於河南身竟潛於漠北轉鄯州都督兼河原軍經畧使營田大使上蔡縣開國伯公曰且耕且戰足食足兵古制也於是關屯積穀高壘止戈轉輸勦勞校卒加勸公之經也恩加雲麾將軍左武威衛將軍經畧營田大使隴西節度副大使上蔡縣開國侯吐蕃恃衆無名嗇禍有素遠掠邇牧橫掉我軍公乃下以單師張以厚陣

惑之以聚散分之以從橫左右夾攻首尾盡殪日公當
西守虜蕃南侵獲其迹人審其陰計咸以投艱在將解
控惟在疑復以本官兼勝都督東受降城大使營田大
使兼朔方軍大總管上蔡縣開國公會六州九姓游
階亂倉卒起於懷袖雜沓混於賓主敵接塞聯馬肥弓
勁其駭人也公分於二蕃制於散地持必攻之郡計必
死之克出奇兵以四征保危堞以內備雖諸軍合勢而
殊効特高恩拜右武衛大將軍賜物三百段餘如故自

頃塞外餘黨留匿傍山或求食致攘或逃死嘯聚猖狂
三窟澶漫數州關隴震驚道路危阻復拜公朔州軍副
大使節度河東道諸軍州兵馬圖是寇也公以教騎雙
絕誠難必擒夷險五岳非使不尅乃傍山釋馬依林去
弓接之以鈇戈扼之以武依襲其所短連其所長函逆
鞠窮旬月底定以功最拜羽林衛大將軍復以本官兼
安東大都護府都督攝御史中丞平盧軍節度使度支
營田海運大使往者奚霫諸蕃之詭信也西屬匈奴南

寇幽薊乘間每鈔無虞亟和公以兵數實多藉用尤費
輕舉則外患不解大舉則內攻更深是以傳陰符移間
謀飛言以誤其使重賞以賣其隣既伐碩交且斷右臂
所謂以武關武以敵攻敵雖賈誼計然晁錯策得無以
尚也朝廷多之拜冠軍大將軍復本任東莞郡開國公
及武神告天有成登岳展禮白羽日野朱旗霞山臨之
以天儀列之以地陣公以驟奔走驅熊羆智勞促來風
疾孔亟詔使累降御醫游臻舊疴有痊後命遄拜復起

前任無何以本官致仕聖上以公節不可奪故信臣禁
兵畧不可謀故臨遣武事入為心膂出作爪牙非夫至
公如貌如武焉可遠符夜拜雅杖邊秋萬里為城四鎮
為岳澄北海之濤水掃西沙之風昏者哉及字疑作暮
律田園庄座枕蓆壯心不已餘興未并宿昔霸陵意將
軍之夜獵屏營細柳翼天子之幸臨去驚悲鳴疲闕跼
顧賓御太息覽對水懷嗚呼日也者飄入於泉山者也
藏歸於澤人謂之遊神謂之遷其可若何以開元十七

年八月二十二日薨於京師平康里之私第春秋六十有八主上感悼邊人掩泣羊祜罷市耿恭勢面見於此矣明年秋七月日葬於白鹿原禮也長子敬廉定遠將軍前檢校左監門衛中郎將上柱國次子希庄中大夫前安北都護上柱國三子敬之前左金吾衛中候賜緋魚袋上柱國四子奉忠前左司禦率府長史賜緋魚袋上柱國五子敬泚前殿中省進馬上柱國並淳孝濟義昭武懿文檢崇讓以後身率周仁以集事光備慈訓追

遠先塋雖史簡可傳而碑板尚闕顧予以舊執詢予以
小才博殷而札翰未宣體大而褒揚不際將竭虛薄曾
深其詞云爾

惟至聖兮內外無憂任英武兮出入孔休總戎幕兮四
紀羽林兮六周樹元勳兮特立隱敵國兮鮮儔救河曲
兮走朔方解遼海兮振漁陽一生一死兮鞍甲卧沙雪
兮疆場橫匹馬兮飛將起萬里兮邊防忠則極兮智亦
苦年且高兮疾不愈事枕席兮忘家瞻日月兮戀主情

還遲兮怛化魂恍惚兮破虜志何深兮命何促時不與
兮才不贖碑一代兮人英征九原兮鬼錄嘉孝忠兮題
紀貽永載兮陵谷

文苑英華卷九百七